



Broj: 02-04-679/23

Datum, 03.05.2023. godine

ZAPISNIK
sa 26. redovne sjednice 7. saziva
Općinskog vijeća Doboj Istok

Dvadesetšesta redovna sjednica 7. saziva Općinskog vijeća održana je dana 27.04.2023. godine u zgradi općine Doboj Istok u Klokočnici sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, savjetnik općinskog načelnika, Arneta Aljić, ovlaštenu državni službenik da obavlja poslove sekretara općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Admir Šišić, pomoćnik općinskog načelnika za društvene djelatnosti branilačko – invalidsku zaštitu i opću upravu, Kenan Mujkić, direktor JZU Dom zdravlja Doboj Istok, Nermin Mrkanović, predsjednik Općinske izborne komisije Doboj Istok i Jasmina Škrebo, direktorica JU za predškolski odgoj i obrazovanje „Dječija radost“ Doboj Istok.

ODSUTNI: Senada Džanić, vijećnica SBB.

Sjednicu je otvorio i vodio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „ Poštovani vijećnici, uvaženi načelnice, predstavnici javnih ustanova i preduzeća, pomoćnici načelnika, ostali gosti, medija ne vidim, ja vas sve srdačno selamim i pozdravljam. Prije nego pređemo na sjednicu zamolio bih tehničku službu da utvrdi kvorum. Prisutno je 16 vijećnika.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Nusret Dautović, predsjedavajući Općinskog vijeća: „Dobili ste Zapisnik sa prošle sjednice i ako neko ima primjedbi na zapisnik. Javlja li se neko za riječ? Ukoliko se niko ne javlja, ko je za ovakav zapisnik?“
 Glasanje: ZA – 16, PROTIV – 0, UZDRŽANIH – 0.

VIJEĆNIČKA PITANJA

Nusret Dautović, predsjedavajući Općinskog vijeća: „ Ima li neko od prisutnih vijećnika potrebu da postavi vijećničko pitanje? Ukoliko nema, prelazimo na dnevni red.“

USVAJANJE DNEVNOG REDA

Nusret Dautović, predsjedavajući Općinskog vijeća: „ Za današnji dnevni red 26. redovne sjednice 7. saziva Općinskog vijeća Doboj Istok predviđeno je 8. tačaka:

1. Razmatranje i usvajanje prijedloga Odluke o osnivanju Turističke zajednice općine Doboj Istok,
2. Razmatranje i usvajanje prijedloga Odluke o izmjeni Odluke o uvjetima i načinu raspolaganja nekretninama u vlasništvu Općine Doboj Istok,
3. Razmatranje i usvajanje Izvještaja o izvršenju budžeta u općini Doboj Istok za 2022. godinu
4. Razmatranje i usvajanje Izvještaja o utrošku sredstava budžetske rezerve za 2022. godinu

5. Razmatranje i usvajanje Izvještaja o radu i finansijskom poslovanju JU Centar za socijalni rad Doboj Istok za 2022. godinu,
6. Razmatranje i usvajanje Izvještaja o radu JZU Dom zdravlja Doboj Istok za 2022. godinu
7. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2022. godinu.
8. Razmatranje i usvajanje Izvještaja o radu Općinske izborne komisije Doboj Istok za 2022. godinu.

Ko je za ovakav predloženi dnevni red?“

Glasanje: ZA – 16, PROTIV – 0, UZDRŽANIH – 0.

REALIZACIJA DNEVNOG REDA

1. Razmatranje i usvajanje prijedloga Odluke o osnivanju Turističke zajednice općine Doboj Istok

Nusret Dautović, predsjedavajući Općinskog vijeća: „Ako vijećnici imaju potrebe za diskusijom stavljam tačku na raspravu.“

Emira Karić, predsjednica kluba vijećnika SDP: „Selamim i pozdravljam sve prisutne. Što se tiče same Odluke, odlična Odluka. Ima posla, jer se procedura mora ispoštovati, kao što je statut i sve stepenice koje se moraju ispoštovati da bi se te Turističke zajednice zaista i vidio rad na terenu. Samo mogu reći čestitam na odluci i želim sretan rad kada se sve ove procedure ispoštuju u ovoj Turističkoj zajednici, jer je ona itekako potrebna na našem terenu. Šta će biti sadržaj njenog rada vidjet ćemo, tu smo da i mi pomazemo. Evo vidimo u samoj odluci da se i volonterski može pristupiti ukoliko ko želi i ko je zainteresiran. Ja mogu iskreno reći, tu sam ako bude bilo potrebe. Smatram ovo dobrom stvari i kažem još jednom čestitam na ovoj Odluci.“

Nusret Dautović, predsjedavajući Općinskog vijeća: „Hvala lijepo, Emira. Javlja li se još neko za riječ po ovoj tački? Vidim da se niko ne javlja, ko je za prijedlog Odluke o osnivanju Turističke zajednice?“

Glasanje: ZA – 16, PROTIV – 0, UZDRŽANIH – 0.

2. Razmatranje i usvajanje Prijedloga Odluke o izmjeni Odluke o uvjetima i načinu raspolaganja nekretninama u vlasništvu Općine Doboj Istok

Nusret Dautović, predsjedavajući Općinskog vijeća: „Izvolite. Javlja li se neko za riječ?“

Emira Karić, predsjednica kluba vijećnika SDP: „Iskreno da kažem bili su mi upitnici kada sam pročitala tačku dnevnog reda i krenula čitanje odluke. Međutim, razumjela sam da je to još jedno usaglašavanje sa zakonom tako da to nije sporno i ovo je odluka koja se može podržati.“

Nusret Dautović, predsjedavajući Općinskog vijeća: „Hvala lijepo, Emira. Javlja li se još neko za riječ? Ukoliko se niko ne javlja, ko je za prijedlog Odluke o izmjeni Odluke o uvjetima i načinu raspolaganja nekretninama?“

Glasanje: ZA – 16, PROTIV – 0, UZDRŽANIH – 0.

3. Razmatranje i usvajanje Izvještaja o izvršenju budžeta u općini Doboj Istok za 2022. godinu

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Mehmed Mehinović, vijećnik SBiH: „Gospodine predsjedavajući, dopredsjedavajući, kolege i kolegice, svi prisutni selam alejk i dobar dan. Mislim da bi bilo ružno da prođe ovako važan izvještaj da se ne progovori ništa. Ja sam i do sada držao dugačke govore kada su u pitanju izvještaji i budžeti, međutim ovo ću skratiti što god mogu više. Ne može se reći, a da se ne pohvali da je i ovog budžeta struktura jako dobra i da je čini mi se napravljen rekord budžet, da su izmirene obaveze prema budžetskim korisnicima, da je u suficitu i da su ogromna namjenska sredstva slegla se u budžet u prošloj godini, što je isto jako dobro. Međutim, ne treba to da zavarava i da budemo uljuljkani da je sve dobro i da je sve kako treba. Ja u principu pošto znam strukturu i pošto smo radili rebalans krajem decembra prošle godine, a pojavila su se određena odstupanja koja po

mojoj procjeni nisu smjela biti i to da prihod bude veći od 240.000 u odnosu na rebalans i da troškovi budu veći u nekom manjem iznosu nego što je u rebalansu. Znam da se može nešto pojaviti, neki računi, ali da baš ovako loša procjena bude rebalansa mislim da nije trebala biti. To je ono što nije dobro. Ono o čemu sam ja uvijek govorio kada su budžeti u pitanju jeste narativni dio budžeta, koji je bio baš nikakav, međutim ovdje se neko potrudio da nam bolje predstavi budžet. Imamo budžete od 2018. godine do 2022. godine i imamo neke male grafikone i neke pokazatelje neko se potrudio i to je dobar korak i to ne mogu a da ne pohvalim, jer je jednostavno to dobra stvar. Pred samu sjednicu nisam znao kako ću glasati po ovom izvještaju zbog svojih principijelnosti, međutim ponukala me je struktura budžeta i ovi grafikoni da kažem evo naprijed se ide otprilike i vjerovatno ću dignuti ruku za ovakav budžet. Ne mogu biti protiv ovoga, jer su ispunjene neke stvari koje sam ja 7 – 8 godina tražio iako nema narativnog dijela, ali ima tabelarni dio iz koga se može dosta toga vidjeti i dosta toga pohvaliti. Naravno ne trebamo biti tako uljuljkani i ja sam se malo bavio ciframa, pa malo samo da predstavim. Budžet je stvarno 5.800.000 KM, a svjedok sam onoga od 1999 i 2000. godine kada je budžet bio 400.000, pa 600.000, pa 1.600.000, pa 3.600.000 i evo hvala bogu 5.800.000 i tu se mora, narodski rečeno, skinuti kapa, jer za ovako malu općinu od 10.350 stanovnika to je jako dobro po glavi stanovnika i mislim da nas svrstava na neki visok nivo. Međutim kada se odbiju namjenska sredstva koja se moraju potrošiti, a neko je uložio truda da ona dođu, ostaje negdje oko 3.600.000 prihoda ostalih. Ako se odbiju indirektni porezi, negdje oko 1.355.000 koji su u porastu, a prvi puta kada su uvedeni indirektni porezi prihodi po ovom osnovu su bili i ne znam zbog čega se to dešava, puno veći nego što su sada, pa su bili puno manji. Sada neki iznos od 1.355.000 daje za pravo da se mogu podmiriti neke obaveze. Realan budžet oko 3.600.000 je jako dobar i jednostavno ne mogu ljudski da budem suzdržan ili protiv ovog budžeta. Ja ću podržati ovakav Izvještaj o izvršenju budžeta i želim sve najbolje i da se nastavi ovako kako jeste. Treća stvar zbog koje sam rekao da skrenem pažnju, a bit će vjerovatno izveštaj o stanju privrede, pa ćete uporediti koliko su porasli prometi pogotovo u trgovinskim organizacijama i prevozničkim uslugama. Vidjet ćete šta je to uticalo, a uticao je porast cijena troškova života i samim tim prihodi po mnogim osnovama iz ovog dijela i dobit je porasla. Kažu da je inflacija negdje oko 18% zvanična, a po mom sudu i po sudu stručnjaka i vas žena koje ste ovdje prisutne i koje idete u trgovinu sigurno je da je ona preko 22 % i sve je to uticalo da bude 22 % određenih prihoda više. Ovo su samo neka upozorenja da se ne uljuljkavamo, jer će poslije ovoga vjerovatno doći do stagnacije i stabilizacije tržišta. Međutim, svima koji su učestvovali u ovome čestitam. Kada je budžet bio nisam ja imao svojih amandmana na budžet i nemam pravo da budem protiv ovakvih budžeta. Međutim, ovo je već određeni napredak u odnosu na ono što ja tražim i što traže evropski standardi. Ovaj izvještaj o izvršenju budžeta nije transparentan i neka mi niko ne govori da jest transparentan, jer nedostaje nešto što treba da ljudima bude jasnije, ali kvalitet je zaista nešto što se mora podržati i u tom dijelu ja svima koji su učestvovali i odradili ovaj dio posla koji je za respekt i čestitam.“

Nusret Dautović, predsjedavajući Općinskog vijeća: „Javlja li se još neko za riječ po ovoj tački? Ko je za ovakav Izvještaj o izvršenju budžeta?“

Glasanje: ZA – 12, PROTIV – 0, UZDRŽANIH – 4.

4. Razmatranje i usvajanje Izvještaja o utrošku sredstava budžetske rezerve za 2022. godinu

Nusret Dautović, predsjedavajući Općinskog vijeća: „Javlja li se neko za riječ po ovoj tački? Ne javlja se niko. Ko je za ovakav Izvještaj?“

Glasanje: ZA – 16, PROTIV – 0, UZDRŽANIH – 0.

5. Razmatranje i usvajanje Izvještaja o radu i finansijskom poslovanju JU Centar za socijalni rad Doboj Istok za 2022. godinu

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Pa eto 12 godina ja vapim da izvještaji preduzeća i javnih ustanova imaju isti obrazac i napokon smo doživjeli i to. Znači ovdje trenutno imamo Izvještaj Centra za socijalni rad, a bit će Doma zdravlja i vrtića i zaista je lakše pratiti. Kada se neko priprema za sjednicu Vijeća onda otvori i svaka mu je stranica identična i ne luta ovaj je ovo stavio na prvo mjesto, onaj ono. Pohvaljujem iako je stvarno trebalo godina i godina da se ovakav način urneka identičan za sva preduzeća i za ustanove ostvari. Što se tiče samog sadržaja uredno i dobro, ali malo bih se zadržala na dijelu koji govori o logopedu. Bit ću iskrena i reći kada je bila prva verzija, znači pričali smo dosta da je potreban logoped u školama i vrtićima i u prvoj verziji osoba koja je radila išla je po školama i nekako mi se to činilo praktičnijim. Trenutno

ona radi pri Centru za socijalni rad i koliko ima korisnika, ne znam, ali ovdje kaže da ne moraju biti korisnici Centra za socijalni rad djeca da mogu koristiti usluge logopeda. Možda da provjerim i da vas pitam je li to istina pošto su ona djeca imala te časove i trenutno ne idu na te časove. Zašto je to veoma bitno? Trenutno nemamo tačnu informaciju koliko djece upisanih u prvi razred će trebati tretman logopeda. Poražavajuće je, jer imamo iz Doboja da 67 % prvačića u općini Doboj treba usluge logopeda, a prije 10 godina to je bilo 3%. Tako da logopedi imaju zaista pune ruke posla. Znam otprilike o čemu se tu radi i treba se sa tom tematikom itekako pozabaviti, jer tretmani logopeda su zaista uspješni. Ja lično poznajem puno puno djece koji da li privatno koriste pri Domu zdravlja ili u Centru za socijalni rad i to jako jako uspješno. Pohvaljujem dnevni centar za djecu sa smetnjama u razvoju, sve čestitke i nastavite tako dalje. Jako je dobro što imate taj budžet i što tu djecu odvozite i dovozite i na taj način im još obezbjeđujete određenu socijalizaciju i određenu edukaciju. Malo bi o pravima radnika čini mi se da ste povećali plate. Da li ima indicija da se povećaju, jer vidimo koliko je porast cijena i da li planirate povećanje plate i u 2023. godini? Još jedanput čestitke, jer je izvještaj itekako prihvatljiv.“

Omer Konjić, direktor JU Centar za socijalni rad Doboj Istok: „Ja vas sve srdačno selamim i pozdravljam. Što se tiče logopeda, logoped nije više zaposlen u Centru, napustio je Centar za socijalni rad i otišao je u Sarajevo. Tako da mi nećemo više vjerovatno imati logopeda i vjerovatno će biti logoped pri Domu zdravlja, jer ima odluka Vlade Tuzlanskog kantona po kojoj će se domovima zdravlja odrediti sredstva za te logopede. Logoped je u početku išao po školama i fizički nije mogao stići zato što je išao i u obdanište, a ovamo su bila sva djeca koja su bila za logopeda, a koja su imala papir da mogu ići logopedu kada odu na kategorizaciju. Dolazilo je nama roditelja bez kategorizacije ako logoped procijeni da je za njega uzme sa njim da radi. Bili su termini i mi smo opremili jednu kancelariju koju je nama ustupilo Sarajevo osiguranje. Preko Word vižna smo opremili kancelariju uz pomoć načelnika i tu je on radio sa tom djecom kada nije u obdaništu. Djeca su mu dolazila redovno mislim da nije bilo problema ni sa roditeljima i da su se oni složili s tim, jer se više vremena posvećivalo svakom dijetu. Što se tiče dnevnog centra tu najviše treba zahvaliti općinskom načelniku, jer je načelnik izdvojio sredstva, kao i Međunarodni forum solidarnosti vezano za taj prijevoz djece. Ukupno je gore bilo 39 djece i koji su i dan danas, iako je taj projekat završen, jer dobili smo preko ovog Word vižna 10.000 dolara i to je utrošeno. Načelnik je i dalje mimo toga nastavio i djeca idu gore redovno. Ima i gore logoped, ali je gore logoped samo za tu djecu. Što se tiče plata povećali smo, a načelnik je obećao pa bit će ako bog da:“

Nusret Dautović, predsjedavajući Općinskog vijeća: „Hvala lijepo, Omere. Javlja li se još neko za riječ po ovoj tački? Ukoliko se ne javlja, ko je za usvajanje ovakvog Izvještaja JU Centar za socijalni rad?“

Glasanje: ZA – 16, PROTIV – 0, UZDRŽANIH – 0.

6. Razmatranje i usvajanje Izvještaja o radu JZU Dom zdravlja Doboj Istok za 2022. godinu

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Emira Karić, predsjednica kluba vijećnika SDP: „Nešto je manje sadržajno u odnosu na Centar za socijalni rad, a vjerovatno to zavisi i od same ustanove. Iskreno počela bih sa pitanjem budući da smo mi na prošloj sjednici Općinskog vijeća usvojili odluku ili izvještaj o anketiranju zadovoljstva građana radom i općinskih službi i općine i preduzeća itd. Ne znam da li vam je preneseno, odnosno da li znate da 50% naših građana prema tom uzorku nije zadovoljno sa uslugama koje pruža JZU Dom zdravlja. Pa eto malo da nam obrazložite da li ste vi upoznati i da li ima knjiga žalbi ili šta već? Koja je to problematika, jer nije to zanemariv broj. Jest da je to uzorak, a uzorak obično pokazuje generalno stanje. Mislim da je malo alarmantno ako je 50% građana u anketiranju reklo da nije zadovoljno. Šta je to? Je li to neka satnica? Samo malo da nam pojasnite, jer to trenutno u izvještaju nismo mogli saznati.“

Mehmed Mehinović, vijećnik SBiH: „Moja diskusija je kao vijećnika i naravno, obzirom da sam hronični bolesnik, redovnog konzumenta usluga našeg Doma zdravlja. Ovo o čemu je kolegica Emira pričala, ja ne spadam u onih 50 % nezadovoljnih, ja sam u ovih drugih 50% koji su zadovoljni sa radom Doma zdravlja. Naravno ima uvijek nezadovoljnih, jer zdravlje je bitan činilac svakog našeg čovjeka i društva i mnogi imaju primjedbe i naravno direktor će to objasniti. Ja bih htio da se vratim na nekoliko stvari i nekoliko sugestija menadžmentu, naravno i Upravnom odboru ako se može, jer ja uvijek u principu govorim i ono što valja i ono što ne valja. Struktura zaposlenih čini mi se da je jako dobra, skoro 85% je visoka i viša stručna sprema što i treba tako da bude, vjerovatno, što govori da se vodi računa o kvalifikacionoj strukturi u Domu zdravlja što

je jako dobro. Ne može čovjek biti protiv ovoga i vjerovatno će ovaj izvještaj biti usvojen jednoglasno. Međutim, ne može čovjek biti ravnodušan da ne spomene neke stvari koje su ovdje u izvještaju, a to je 46.930 u službi Hitne pomoći je broj pruženih usluga. Zamislite koliko je to i koji je to posao. Ja sam se bavio malo matematikom, pa na 24 sata 130 ljudi je otprilike. Da li je na jednom čovjeku bilo više usluga ili manje, ne znam, ali 130 ljudi je otprilike, pa i 100 ljudi da se primi to je jako dobro. 129.922 laboratorija je uradila zvaničnih pregleda i to je 500 usluga skoro na svaki radni dan. To je frapantno i nekim ljudima treba odati priznanje za to i to onim koji rade u Hitnoj pomoći i laboratoriji, a vjerovatno nije manje, ali da dalje ne bih pričao i da ništa drugo ne diskutujem po ovom pitanju. Kada se radi o finansijskom izvještaju ima moja sugestija i menadžmentu Doma zdravlja i Upravnom odboru, tražit će se da se za finansiranje malo više poveća iznos. Međutim, vidimo da se poslovalo sa dobiti, odnosno nije dobit u javnoj ustanovi to je višak prihoda nad rashodima se pojavio i da je u odnosu na planirano ostvareno više za 30.000 KM i bit će teško u toj varijanti i da ste makar potrošili ove pare negdje da ih nema, pa da se može tražiti. Teško je kod ovih viših instanci tražiti pare kada je u pitanju ovakva finansijska slika. Ono što ja često govorim i daje nam pravo da govorimo da naš Dom zdravlja ima prihode ostvarene oko 3 miliona i to je skoro ko budžet naše općine bez namjenskih sredstava. Prema tome to nam daje za pravo da govorimo da su finansije jako pokrivena, da je direktor sa svojim saradnicima ispunio sve obaveze po plaćama po pitanju radnika, da su nabavljena neka sredstva i da je to jako dobro. Na kraju ima jedna: u narednom periodu aktivno raditi na ranom otkrivanju i sprečavanju i suzbijanju uzroka oboljenja i povređivanja, sudjelovanje u podizanju i održavanju psiho fizičke i zdravstvene sposobnosti radnika. Ja sam mislio ovdje da stoji naših stanovnika, naših građana Doboj Istoka da treba da stoji i da ne stoji samo radnika, jer ovdje se može misliti da su samo radnici Doma zdravlja, radnici. Ima i nas penzionera o kojima treba voditi brigu, a vodite brigu i to je tačno. Ja u svoje ime kao pacijent gdje je moja porodična medicina u Velikoj Brijesnici odajem priznanje tamo timu i doktorima i volio bih da se ustali ako je ikako moguće da bude ljekar stalno, jer vidim da se često mijenjaju, pa bih volio da to bude jedan ljekar, jer to za nas puno to znači. Znam da je to teško, znam da ljudi odlaze, znam da imaju bolovanja i znam da je sve, ali da direktor se malo pobrine da češće bude stalni doktor porodične medicine i ne samo u Brijesnici, nego ako je ikako moguće u svim timovima porodične medicine. Čestitam menadžmentu, čestitam radnicima mislim da su dobar posao odradili. Ovo nezadovoljstvo što je izraženo, toga će uvijek biti. Kada bi pitali ne znam zašto i anketu proveli uvijek ima ljudi koji drugačije misle i ne treba se na to ljutiti nego to treba biti motiv da se još bolje i još više radi. Svako dobro i želim da nastavite da radite ovako kako ste radili.“

Hasan Hasančević, predsjednik kluba vijećnika SDA: „Ja ću sve pozdraviti i poselamiti pošto se prvi put javljam. Nisam mislio ništa govoriti, ali evo malo o nezadovoljstvu građana ću nešto reći. Sve što mi uradimo u Doboj Istoku, pa uključujući i izvještaje svih organizacija naiđe na različite aršine ocjenjivanja. Svi smo vezani i za općinu Gračanica i Doboj, ali evo ovakvi kakvi jesmo trebamo pitati svoju familiju u drugim općinama koji žive na selima, pa idu u „gradove“ na ljekarske preglede kod porodičnog medicinaru, u laboratoriju, da snimaju pluća i tako dalje, da ne nabrajam, pa će vidjeti kada dođu na red i kako se osjećaju kada dolaze u te ustanove i kakav je prijem. Slažem se da ima propusta, ali naš Dom zdravlja onaj ko ga ne konzumira ne zna šta znači imati Dom zdravlja, ne zna šta znači imati sve ove ovdje usluge koje mi imamo. One mogu biti, činjenica je i kvalitetnije i bolje, ali evo menadžment na tome radi i ne da zadovoljavajuće već je možda i više petici nego dobrom kada ocjenjujemo. Tako da u ovom dijelu što se tiče izvještaja, izvještaj je dobar, napravljen je tako kako jest, a za sve ostalo hvala Bogu i hvala ljudima koji su napravili Dom zdravlja kao instituciju u Doboj Istoku, a naše je da je dovedemo do malo boljeg kvaliteta rada. Evo tu je menadžment i da podržavamo svi taj rad.“

Kemal Skopljak, predsjednik kluba vijećnika SBB-BPS: „Pošto se prvi puta javljam prije svega da sve poselamim i pozdravim. Odmah da kažem drago mi je čuti od prethodnih diskutanata ovakve diskusije vezano za Dom zdravlja pošto svi znate da dolazim iz Doma zdravlja. Vjerujte mi, pošto radim u takvoj službi mi imamo fantastične doktore i zato mi nije jasno ovo 50 - 50 izjašnjavanje što je bilo. Vjerujte da mi nije jasno. Mi kada odemo u Gračanicu, samo ću vam navesti primjer i ovo javno govorim, naši ljekari su daleko kvalitetniji i daleko bolju dijagnozu postavljaju nego oni tamo sa onih par aparata što imaju i svega toga. Na kraju ispadne da mi gubimo vrijeme u tim službama koje gore posjetimo. Vjerujte, ovo odgovorno tvrdim, tako da sam stvarno malo iznenađen sa tim. U svakom slučaju izvještaj je dobar, jer ja znam šta se radi i koliko se radi gore najbolje i nemam primjedbi na izvještaj. Htio sam samo postaviti jedno pitanje direktoru pošto evo par godina bude u izvještaju da trebamo promijeniti stolariju, da trebamo zamijeniti krov da li imamo ikakav okviran datum do kada bi se to trebalo uraditi? Evo par godina ista stvar se ponavlja.“

Haris Sinanović, predsjednik kluba vijećnika SBiH-SDP: „Selam alejk i dobar dan. Pozdravljam sve prisutne. Ja ću reći samo što se tiče mog ličnog iskustva, kao i moje porodice isto tako sve pohvale što se tiče

Doma zdravlja Doboj Istok. Ja ću postaviti jedno pitanje na koje možda može direktor odgovoriti pošto sam se i sam uvjerio u te stvari i mnogi građani su me pitali za te stvari da postavim to pitanje na Općinskom vijeću Doboj Istok. Znači, zašto se u Hitnoj pomoći Doboj Istok i ne samo u Doboj Istoku, nego u većini hitnih pomoći TK, naplaćuju neki lijekovi kada je Hitna pomoć u pitanju mada su odlukom Ministarstva zdravstva TK i Zavoda zdravstvenog osiguranja ti lijekovi subvencionirani iz kantonalnog budžeta?“

Emira Karić, predsjednica kluba vijećnika SDP: „ Replika. Ja bih da razjasnim, jer imam osjećaj da je kolega Hasko nekako ljut ili već kakva je bila njegova diskusija. Ja sam se samo osvrnula na anketiranje. Znači nije nama bez veze data ta mogućnost da se anketiraju građani i da li to bio Dom zdravlja ili nešto drugo da bi jednostavno mi progovorili i raspravljali o određenim temama. Što se tiče prosvjete da se sada anketira možda bi bilo 80 – 90% nezadovoljnih roditelja, ali mi to moramo staviti na dnevni red i reći zbog čega su neki nezadovoljni time. Tako da o tome govorimo. Sasvim slučajno stavila sam nešto što smo mi dobili na prošloj sjednici i da vidimo možda je baš razlog to plaćanje na hitnoj itd. Govorim šta bi to moglo biti da mi prodiskutujemo i da vi kao menadžment o tome malo više vodite računa. Ono što bih pozdravila, nije možda tema ovog dnevnog reda, odnosno ove tačke, to je ukidanje onih markica, jer ono je bilo ljudi užas i hvala Bogu. Ja sam lično pokušala intervenirati preko određenih kanala, nije pilo vode, jer to je Skupština Tuzlanskog kantona. Zahvaljujem se podnosiocima inicijative, jer to godinama maltretira građane, po meni bespotrebno. 1.000 puta sam rekla evo naplatite mi 50% još onog dijela koji se uzima za zdravstveno osiguranje, nemojte me tjerati da kao neki poslušni vojnik idem u banku, tri četiri stavke moram odraditi zbog tih nekih 20 KM. Kažem pozdravljam, ako iko čuje, podnosiocima te inicijative.“

Hasan Hasančević, predsjednik kluba vijećnika SDA: „ Nisam znao da moram biti uvijek fin. Izvinjavam se kolegice, ako je moja faca vas iritirala, drugi put ću sa osmijehom prezentirati što treba.“

Kemal Bratić, općinski načelnik: „ Prije diskusije želim sve da vas poselamim i pozdravim, pa iako je sjednica pri kraju želim vam uspješan rad i sa malim zakašnjenjem Bajram Šerif Mubarek Olsun. Da li sam zadovoljan, da li sam u ovoj grupaciji zadovoljnih ili nezadovoljnih pacijenata, građana, kako god hoćete, to ne znam ni sam. Neću hvaliti Dom zdravlja, pošto ovi sami sebe hvale iz Doma zdravlja. Ja mislim da uvijek može bolje i uvijek može više. Ono što ću reći jeste da nažalost i uposlenici Doma zdravlja znaju da ima gore par osoba i ako jedna osoba napravi neki incident, čitav Dom zdravlja ne valja. Dobar je Kemo, dobar je Nusret, dobar je Kenan, ali jedna osoba ako napravi ... Imamo mi gore i pritužbi, znamo mi da ima poneka pritužba, ali nije to toliko strašno koliko je pokazala ta anketa. Ja mislim da to nije toliko i ide u sve boljem pravcu. Nažalost ti problemi koji gore nastaju, ti ljudi to nose od kuće. Nije tu kriv menadžment, nije tu kriv ljekar i ne prave ljekari probleme, bar do mene do sada nije došlo da je neki ljekar napravio problem. Obično je to neko osoblje koje je, da kažem, na prvoj liniji ili na onoj komunikaciji gdje treba da pokažemo da smo mi tu radi građana, a ne građani radi nas. Na kraju krajeva kao što neko reče niko od nas ne ide ljekaru onako hoćemo da idemo malo da bi ubili vrijeme, jer verovatno imamo potrebu da danas pregledaju. To je ono što sam ja rekao ovom direktoru i ono što sam govorio i prethodnom direktoru, meni je bitno da su pacijenti zadovoljni a ostalo je manje bitno. Moram istaći da smo nekada imali problem i u Hitnoj pomoći, a to je sve zavisilo od pojedinca koji tu radi. Sada nema. Zašto? Ljudi rade, nemaju kada ili su u transportu ili su u pregledu ili reanimacija ili je bilo nešto drugo. Oni koji imaju vremena, oni prave probleme, bave se politikom, prenose tračeve i tako je, nažalost, u svakoj instituciji. Znači oni koji rade oni nemaju kada da vode tuđu brigu. Evo ja želim direktoru da poručim odavde javno da nastavi u onom pravcu u kojem je započeo i da to sve svedemo na nekakav minimum. Šta je bitno šta hoću da kažem? Naš Dom zdravlja je položio ispit, ja ću reći makar 9, kada je bila korona. Čitav Kanton je brujao o našem Domu zdravlja kako su uspjeli ovo, kako su uspjeli ono i oni su tada položili, a naravno zahvaljujući menadžmentu i organizaciji i svim uposlenicima koji su zaposleni u Domu zdravlja. Opet kada bi to stavili na nekakav kantar nisu svi potegli isto i nikada neće i nigdje neće. To je ono što je bitno i to je ono što mi moramo raditi i insistirati i u Domu zdravlja i ovdje u Opštini i u Centru i u Obdaništu da nekako ljude natjeramo da ne vode tuđu brigu, jer to je veoma opasno, jer onda ne radimo onaj posao za koji smo plaćeni. Nije ovdje niko volonter, svi su plaćeni i imaju dobre plate. Opet traže povećanje i vjerovatno će dobiti, ne mogu ne dobiti, jer ko će nas liječiti. Tako da mislim da anketa koja je to pokazala da li je ona tačna ili nije, da li su anketirani ljudi imali nekakva loša iskustva u Domu zdravlja? Ja mislim da nije i da je to neki manji procenat, ali opet se vraćam na početak to je samo par pojedinaca koji smatraju da je Dom zdravlja njihov, jer su oni tu od rata, pa poslije rata i na taj način rušimo kredibilitet našeg Doma zdravlja. Ne treba prezati da se tim pojedincima i zahvalimo na njihovim uslugama i da ih pošaljemo kući ili da ih pošaljemo gore u rudnik, negdje na kliniku ili ovamo u Emmaus da vide kako to treba da se radi. Neće se direktor naljutiti ja ću odgovoriti vezano za ovaj krov i stolariju. Mi smo još prošle

godine platili sa Fondom za zaštitu okoliša, znači Općina Doboj Istok pola, a Fond za zaštitu okoliša pola federalni, 126.000 KM za sanaciju krova, peć, stolariju, stiropor i evo još ništa. Ja vjerujem da je problem oko te tenderske procedure. Imamo potpisan sporazum, isplatili sve fondu i čekamo, jer ne znamo ni mi datum, jer nije do nas. Svima ovima koji su danas podnosili izvještaj i ovi poslije koji će biti želim uspješnu i ovu godinu. Bitno je da naš Dom zdravlja nije u nekakvom deficitu, jer ima dosta takvih ustanova koje su u deficitu po nekoliko miliona ili po nekoliko desetina miliona zahvaljujući ljudima koji to nisu radili domaćinski. Ja vjerujem da će direktor i u ovoj godini dati sve od sebe sa svojom ekipom da bude što manje nezadovoljnih građana, a svi ćemo se zajedno potruditi da pomognemo ono što je u našoj moći.“

Refik Šuvalić, vijećnik SDA: „ Načelnice, predsjedavajući, kolegice, kolege, pomoćnici, direktori srdačno vas selamim i pozdravljam. Evo načelnik da se družim s njim ovih dana malo više rekao bi da smo pričali i uzeo mi je maltene riječ, da skoro nisam imao ni potrebe da se javim, ali kada sam tu par riječi neće biti na odmet. I sa doktorom Nerminom, a ne znam da li se doktor sjeća imali smo dva tri slučaja, odnosno moja punica, majka dva poginula šehida, znači bilo je upravo ovo što je načelnik iznio sa prvim osobljem koje je na prijemu. Nažalost i ta što je na prijemu je iz iste te kategorije i razgovorima te su se stvari slegle. Mi u projektu MEG-a imamo određene panele prvi kontakt po pitanju prijemu dojava za kvar za žalbe građana. Znači taj prvi pristup po meni je toliko značajan i ja sam vrlo rijetko kada čuo za doktore, jer imamo doktore kakve imamo i hvala Bogu ja sam zadovoljan. Sa ljudima sa kojima sam pričao, pogotovo u zadnje vrijeme i ove internističke i neke još specijalističke usluge koje su ovdje pružaju, jako je puno pohvalnih riječi da neki kažu bolji smo i od gračaničkoj doma zdravlja i bolnice i meni je to drago, to meni imponuje. Znači prvi kontakt ove osobe, jest da su i na najvećem udaru ovi na prijemu, ali lijep pristup i lijep kontakt sa osobom, koja je vjerovatno došla zbog bolesti a ne da nekoga vidi, je vrlo bitan. Tako i kod ovih naših usluga, znači ako ti čovjeku objasniš na lijep način da će se riješiti kvar i tako isto i ako su gužve i ako, ne znam, neko dođe pa se ne osjeća se dobro, a nije naručen. Uglavnom su ta nezadovoljstva i tako da u tom dijelu mislim da trebamo sa tim ljudima popričati koji su direktno prvi na udaru, ja mislim da bi građani i sigurno je ova anketa dijelom zbog tih stvari. Ovo ostalo sve pohvale, pogotovo za Hitnu pomoć, jer sam i ja lično čuo dosta dobrih riječi vezano za rad naše Hitne pomoći. Još jedanput sretno i menadžmentu i svim uposlenicima i da bude još bolje.“

Izet Hodžić, zamjenik predsjedavajućeg Općinskog vijeća: „ Poštovane kolegice i kolege vijećnici, uvaženi načelnice sa saradnicima, predstavnici, odnosno direktori javnih preduzeća i ustanova, predsjedniče Općinske izborne komisije, ostali gosti želim sve srdačno da vas poselamim i pozdravim. Jednostavno i ja sam osjećao potrebu da se javim za diskusiju po Izvještaju Javne zdravstvene ustanove Dom zdravlja Doboj Istok. Osjećam potrebu prije svega i kao vijećnik, predstavnik naših građana općine Doboj Istok i predstavnik privrednika iz kojeg segmenta dolazim. Imam dvije stvari da kažem, ništa posebno, ništa lično direktoru, ni JZU Dom zdravlja, jer znam da su to, iz ličnog razgovora sa direktorom, stvari koje se, da kažem, dešavaju, a odluke se donose u Zavodu za javno zdravstvo Tuzlanskog kantona. Ali evo nije loše ovako javno progovoriti, pogotovo kad se pruži prilika. Prije svega bi se referisao na Harisovo pitanje, ja sam prije možda godinu dvije takođe postavio pitanje. Stvarno to djeluje prije svega ružno i vezano za ove stvari što se dešavaju u javnim zdravstvenim ustanovama na području Tuzlanskog kantona, meni je tada odgovoreno da je to odluka Zavoda za javno zdravstvo da se u primarnoj zdravstvenoj zaštiti naplaćuju lijekovi od korisnika koji apliciraju u javnim ustanovama. Znači Dom zdravlja je ustanova koja pruža primarnu zdravstvenu zaštitu. Ali evo kažem ako ne pričamo i ako ne razgovaramo ispadne to da smo saglasni sa tim i kada pričam sa ljudima iz drugih kantona to djeluje nemoguće. Znači dođe čovjek u službu Hitne pomoći i da mu se lijek, idi kupi i donesi sutra. Postoji mnogo drugih načina i ja vjerujem da direktor sluša i ako postoji organ gore u Kantonu ili kolegij direktora domova zdravlja da može postaviti pitanje. Ovo što Emira reče svima nama je poznato i ne vidim ni jednu osobu na Kantonu koja nije oduševljena ovom inicijativom i donošenjem odluke Skupštine Tuzlanskog kantona da se ukinu te famozne markice i maltretiranje. Znači pored svega i uplaćivanja doprinosa radnicima i svega toga uvedene su i te markice i onda još kao treći vid naplaćivanje i kupovina tih lijekova. Ružno djeluje, kažem ne odnosi se ni na koga osobno, ni na koga lično, a puna su nam usta stvaranja što boljeg ambijenta za življenje u čitavoj Bosni i Hercegovini, a govorimo konkretno o našoj lokalnoj zajednici. Mislim da se može kroz skupštinske inicijative donijeti odluka da se ova odluka stavi van snage. Vjerovatno su to ogromna finansijska sredstva koja bi trebala biti planirana u budžetu Tuzlanskog kantona za ovu namjenu. Mislim da bi pozitivna reakcija korisnika primarne zdravstvene zaštite bila da se to ukine. Druga stvar koja, neću reći da je bitnija, a odnosi se na ovaj, neću reći da je samo za realni sektor i za privredu, jer dolazim iz tog sektora, ovo se odnosi i na javni sektor, ali iskazujem svoje nezadovoljstvo kao privrednik. U praksi koja se odnosi, a razgovarao sam sa direktorom Doma zdravlja, na bolovanje naših uposlenika, kažem nije to samo za realni sektor aršini i pravila su ista i za javni sektor. Onako kao običnom čovjeku i normalnom čovjeku meni

nepojmljivo da moj radnik bude na bolovanju 40 dana, to sam rekao i direktoru i da ljekar porodične medicine njemu prekida 40. ili 41. ili 39. dan bolovanja i prekida mu bolovanje na jedan dan da bi sutradan otvorio ponovo bolovanje pod nekom drugom šifrom i nastavilo se opet 40 ili 35 dana. Za mene to nije lijepa, nije dobra poruka, a pogotovo apostrofiram na vlasnike preduzeća, jer do 42 dana, ne znam je li bila izmjena, pada na teret poslodavca bolovanje, a preko 42 dana ide na teret Zavoda za javno zdravstvo i ne vidim ja šta je tu sporno. U razgovoru sa direktorom on je rekao da je to, čini mi se, preporuka Zavoda za javno zdravstvo da se to tako radi. Preporuka nije obavezujuća. Mislim da u ovom slučaju treba da se štiti, jer ne izlazi se u susret. Ne može čovjek biti 40 dana bolestan, pa jedan dan zdrav i opet 40 dana bolestan. Kolega, koji je jedan od najvećih privrednika na području općine Doboj Istok, mi je pričao i nemam razloga da mu ne vjerujem, jer imam iskustva iz vlastite prakse, da mu je jedan radnik bio 180 dana na takav način na bolovanju. Iskazujem javno negodovanje i kažem nije to do Doma zdravlja, ali i Općinsko vijeće i menadžment Doma zdravlja mogu reagovati. Ako mi uredno servisiramo i uplaćujemo zakonom predviđena sredstva kada obračunavamo doprinose za platu i odvajamo ta sredstva i uplaćujemo na žiro račun na koji treba Zavodu za javno zdravstvo, ne vidim zašto nam se ne bi, neću reći izašlo u susret, nego zašto se ne bi postupilo kako treba. Znači preporuka, ja kažem vjerovatno laik sam što se tiče prava, nije obavezujuća, a mislim stvarno nije u redu to. Evo doći će valjda vremena, kao što smo dočekali za ove markice, da neko dođe u Skupštinu, da kažem da ovi podnosioci inicijativa da dođu i da imaju snage da tu inicijativu sprovedu. Čestitam na toj inicijativi i spovođenju i kažem nadam se da će biti tih ljudi koji razumiju. Kažem možda fali ljudi u Skupštini iz realnog sektora, ali i ovi koji dolaze vjerovatno imaju razumijevanja, jer ne vidim razlog zbog čega se to radi. Ja ne vidim i ne može mi niko objasniti, pogotovo i evo treći segmet koji mi ne ide u glavu, a to je jednostavno zakonska procedura, da radnik koji se povrijedi na radnom mjestu, a sami smo mi svjedoci htjeli mi to priznati ili ne, poslodavac izbjegava da prijavi tu povredu da se to desilo na radnom mjestu iz jednog prostog razloga i kada ja pričam sa nekim, veliki broj ljudi, možda i ovdje prisutnih kolega ne znaju da liječenje i rehabilitacija tog radnika od momenta povrede, od momenta kada je radnik otišao u službu Hitne pomoći, pa do izlaska iz banje i rehabilitacije, kompletno liječenje tog radnika i rehabilitacija spada na teret poslodavca. Ja bih volio da vidim te ljude koji su digli ruke za izglasavanje tog zakona. Jednostavno ne vidim razlog koliko god se trudio, kažem oprostite što vas zamaram ovdje, ovo je najniža organizaciona jedinica od koje bi možda trebale poći neke inicijative, jer tu je direktor to su neke stvari ako želimo rasteretiti privredu i realni i javni sektor. Neću da kažem da su to neki minimalni ustupci, jer nisu to ustupci, to bi tako trebalo da bude. Mislim direktore, da ste razumjeli moju diskusiju i hvala vam na razgovorima i u predstojećim trenucima ja ću se zalagati i dati sve od sebe, ono što je normalno u mojoj moći, da to bude kako treba.“

Kemal Skopljak, predsjednik kluba vijećnika SBB-BPS: „Ja ću kratko da razjasnimo neke stvari ovdje pošto vidim bilo je pitanja vezano za plaćanje lijekova. Pošto ja radim u toj Hitnoj i da vam pojasnim o čemu se radi. Mi u Hitnoj službi imamo sve navedene lijekove koje moramo imati kao Hitna služba, sve ampulirane lijekove. Svaki hitan slučaj dobije komplet sve džaba. Ono što dolazi i što ne treba da ide kroz hitnu poslijepodne tipa treba vitamine kupiti, treba dobiti infuziju da se nešto malo popravi, a spada pod porodičnu službu to se pošalje. Vidjeli ste koliko usluga imamo i kada mi sve ta davali džaba, gdje bi bili? Bankrotirali bi. Vjerujte toliko toga ima poslije 3. u hitnoj što ne pripada Hitnoj službi i kada bi mi pokrivali tu terapiju ne bi nas nigdje bilo. Samo da znate o čemu se radi.“

Hasan Hasančević, predsjednik kluba vijećnika SDA: „Pošto smo izašli iz okvira ja ću pokušati kratko. Što se bolovanja tiče, ja sad kao sindikalac, bolesnim davati bolovanja bez obzira koliko, a zdrave vraćati na posao. To je pravilo nepisano i tako se svi ponašaju i poštuju. Znači, onaj ko je bolestan i 39 i 399, pogotovo ako je zaradio oboljenje, povredu i tako dalje, ne daj bože profesionalno. Doktori znaju šta trebaju procjenjivati, ja neću u pojedinačne slučajeve da ulazim, ovo govorim kao sindikalac, imaju prava iz radnih odnosa za bolovanja. Ko plaća, ko ne plaća? Da se ne plaća zdravstveno zdravstvenom zavodu išlo bi možda radniku u plaću i tako dalje, da ne idemo u duboke teme. Što se tiče još nekih stvari moramo se malo educirati na svaki propisani recept koji propiše ljekar i na koji se plati uredno dobije se račun u apoteci, uredno se prijavi na kraju godine za povrat poreza i ta sredstva se dobiju nazad. Hvala kolegi na objašnjenju vezano za Hitnu pomoć.“

Kemal Bratić, općinski načelnik: „Dobro je što se vodi diskusija, jer ovo je po meni zdrava diskusija, niko ne diskutuje sa nekakvom lošom namjerom, pa i Izetova diskusija iako nije naša nadležnost, čovjek jednostavno ima potrebu da podijeli sa ovim skupom koji izuzetno cijeni. Ovo što je uvaženi Skopljak rekao ja ću samo nadodati da je moja procjena da od ovih preko 100.000 intervencija samo 30% hitnih slučajeva. Čak ljudi nekada zloupotrebljavaju Hitnu pomoć, jer neće da ode tamo ili se ne može naručiti, pa ode poslije 3 sata.“

To je moja pretpostavka, jer bio sam i ja po neki put u Hitnoj pomoći i vidio sam kakvih sve ima pacijenata. Nije naše da mi ovdje diskutujemo o tome, jer je to neko gore propisao. Naše je da mi to probamo da pokušamo da to ide na bolje. Kada bi me neko pitao da li da ugasimo Dom zdravlja ili Hitnu pomoć, ja bih rekao ostavite Hitnu pomoć, jer ona je zbilja potrebna i radi jedan dobar posao. Radi posao i ovaj ljekara u timovima, a ni jedan ljekar neće nikoga vratiti. Ko će to se usuditi da vrati nekoga, jer je došao da traži neku uslugu bez obzira koliko je ona bezazlena. Kada se radi o bolovanjima nažalost ima dosta zloupotrebe i neka je svim poslodavcima Bog na pomoći sa tim zloupotrebama bolovanja. Ako ja mogu kao pacijent u roku 3 - 4 mjeseca otići sa, ne znam, sa 3,4 ili 5 dijagnoza, jer neko jednostavno da bolovanje ili me pošalje na nekakva ispitivanja koja možda čak i ne postoje ili nešto drugo, onda se mi svi trebamo zapitati i povesti računa o takvim stvarima. Zaboravio sam u prvoj diskusiji da kažem, a govorit ću o našem Domu zdravlja, jer drugi me ne interesuju, smatram da je naš Dom zdravlja jedan od najboljih u Kantonu. Ima ovih malih sitnica koje se mogu promijeniti ono što je Refko govorio znači da je prva komunikacija i uopštena komunikacija sa ljudima veoma bitna ili najbitnija. Tako da je to oblast koja je široka, koja je problematična, ne samo ovdje kod nas, jer kada se popnemo na Kanton i Federaciju dolazimo do većih problema, do strašnijih problema. Imamo tamo te operacije koje su u inostranstvu. Razgovarao sam sa raznim ljekarima koji kažu da je to nekada bespotrebno i da nema spasa, ali ljudi se kada je zdravlje u pitanju bore i ne pitaju za sredstva i sakupljaju. Još jednom direktoru, ja vjerujem da će on izaći i odgovoriti na pitanja koja su postavljena, želim puno uspjeha, kao i svim ovdje prisutnim direktorima javnih ustanova i preduzeća.“

Izet Hodžić, zamjenik predsjedavajućeg Općinskog vijeća: „ Nije mi jasno zbog čega sam ja izašao, jer ja diskutujem o tački dnevnog reda, a izvještaj je Doma zdravlja i mislim da s moje strane korektno. Ne znam, ako je neko zaključio da sam ja izašao izvan okvira, to je njegov problem. Nisam mogao da se ne javim i želim da podcrtam da ja nisam ulazio u segment da doktori propisuju bolovanja u tom smislu da sam ja nezadovoljan i da sumnjam u odluku ljekara Doma zdravlja da li neko treba da ide na bolovanje, nisam to ni jednom riječju rekao niti sam pomislio na to. Akcenat sam stavio na prekidanje bolovanja 39-40. dan i proglašavanje radne sposobnosti jedan dan i ponovo bolovanje. Ako je neko pogrešno shvatio, to je njegov problem.“

Zerina Subašić je napustila sjednicu u 11,05 sati (opravdano).

Haris Sinanović, predsjednik kluba vijećnika SDP-SBiH: „ Vezano za ovo pitanje koje sam ja postavio, stvarno mi nije cilj da ovo ide kao kritika Domu zdravlja Doboj Istok. Rekao sam sve pohvale za rad Doma zdravlja Doboj Istok, jer moja porodica ima lijepo iskustvo pošto mi je kćerka stalno i kod porodičnog doktora i na Hitnoj pomoći. Međutim bitno je da se bar zakotrljalo koliko vidim, pa sa ove distance možda donesemo i neki zaključak. Evo pročitat ću ovdje nekim kolegama samo da vide o čemu se tu radi. Službe hitne pomoći u Tuzlanskom kantonu uskoro bi mogle biti predmet zvanične istrage zbog kako mi se čini nezakonite prakse da od pacijenata naplaćuju ampularne lijekove koji su prema odluci Ministarstva zdravstva TK i Zavoda zdravstvenog osiguranja subvencionirani iz kantonalnog budžeta. To je ono što sam rekao i u prvom obraćanju.“

Kemal Bratić, općinski načelnik: „ Skopljak je to lijepo rekao. Znači moramo razgraničiti hitne slučajeve i one koji nisu hitni. Ako nekoga boli grlo, pa treba da dobije pencilin, normalno da će ga kupiti, jer nije hitan slučaj ako boli grlo ili ako kašlje, pa došao u 7 sati poslije podne. Znači, moramo razdvojiti hitne slučajeve i šta je hitni slučaj. Znači ljudi nekada zloupotrebljavaju tu hitnu. I ja sam za to ako je to neko uradio, neka ga odmah prijave da potjeramo ko je to uradio, ali ako je naplaćen hitan slučaj, ako je reanimacija, ako je ne daj Bože saobraćajna nesreća, ako je ujed zmije, ako se neko posjekao, to su hitni slučajevi. Nije hitan slučaj ja kašljao pa došao u 4. sata jer mi je mrsko bilo doći na redovnu kontrolu porodičnom ljekar. Slažem je sa tim, ali ako je neko to uradio u hitnom slučaju.“

Hasan Hasančević, predsjednik kluba vijećnika SDA: „ Pošto je ovdje spominjano dobrovoljno osiguranje – markica ja ovdje predstavljam klub vijećnika SDA i otvoreno za govornicom kažem da su u Vladi Tuzlanskog kantona uvijek normalni ljudi i da su i dan danas normalni i da su bili i u prošloj normalni i da je za ovo zaslužan premijer Vlade Tuzlanskog kantona Irfan Halilagić koji dolazi iz reda SDA. Da li mi to prihvatili ne prihvatili ili nam je teško ovdje za govornicom to izgovoriti. Evo ja ću izgovoriti za svakoga ko god je šta uradio da bude u korist građana Kantona, a da ne govorimo općine Doboj Istok javno za govornicom to je tako. Ja predstavljam taj klub i dužan sam prema svojoj stranci da to kažem i da istaknem da je to tako.“

Emira Karić, predsjednica kluba vijećnika SDP: „ Ovdje smo se zahvalili, sve je bilo u redu, dobro, tačno ali isto tako moram ispraviti krivi navod. Ova inicijativa je postavljena od strane skupštinske zastupnice Lejla kada je bila u SBB stranci. Otprilike isti je bio sastav gore u Skupštini i te njena inicijativa nije tada podržana, vjerovatno nije imala većinu, a nije ni bitno. Ali kada ste otvorili već to i idete istim kursom, pokušajte ne ići tim kursom bolje i za nas i za našu okolinu, da ne govorim državu. Pustite te duboke države koje su se do sada 30 godina radile. Nećemo ti kursem ići, jer idemo sve na užtrb dobrote građana. Ja sam pohvalila dakle tu inicijativu od strane nisam navela koga, a na kraju krajeva ta osoba je ponovila svoju inicijativu i bilo je zainteresiranih skupštinskih zastupnika, pa su je eto i usvojili. Ovdje po meni premijer da li je bitan, da li nije, ruke su bitne koje su usvojile tu inicijativu i bespotrebno spominjemo ko je zaslužan a ko nije, jer dobra je stvar što je to ukinuto. Kažem ja ću se odreći još 50% nameta i nemojte mi samo te stvari koje su za mene bile ponižavajuće, te kupi, ispuni, idi u banku, ko se toga sjetio. Meni nije jasno ko se toga sjetio. Što se tiče da li mi tu temu idemo ili ne idemo, tema je zdravlje i mi imamo pravo ovdje pričati o zdravstvu. Isto tako na nastavničkom vijeću imam pravo pričati o zakonima o obrazovanju, jer možda taj direktor koji sluša na nastavničkom prenese na aktiv direktora i to se prosljedi. Sve je zdrava diskusija i ne treba bolovati od nezdrave diskusije. Ja se slažem sa kolegom kada kaže prekine bolovanje i vjerujte mi u Gračanici ima takvih dosta primjera i reagovalo se ili jesi bolestan ili nisi bolestan. Kakva preporuka, ja ne vjerujem da je to preporuka. Ne vjerujem da je neko javno rekao da je to preporuka. To se možda radi, ali da je to preporuka, to su stvarno neozbiljne i bezobrazne stvari, jer onda država nije mati, nego maćeha ovih „jadnih“ privrednika. Zaista privrednicima treba u svakom slučaju sve što se može pomoći i da guramo ovu državu samo naprijed.“

Hasan Hasančević, predsjednik kluba vijećnika SDA: „ Ne razumijem kolegicu Emiru, jer počeli smo sa mojom ljutnjom, a vidim da je nešto ljuta, ne znam šta je problem i ne vidim razloga za ljutnju. Ja sam rekao što sam rekao i meni je drago što ste vi naglasili ko je podnio inicijativu i drago mi je što se kolegica Lejla vratila na pravi put, na kolosijek koji brani ovu državu i da je shvatila da samo tako mogu proći njezine inicijative i ideje i tako dalje i tako dalje. Da više ne duljimo, znači ko god želi bujrum na naš kolosijek nije problem.“

Emira Karić, predsjednica kluba vijećnika SDP: „ Rekla sam da neću se „pecati“ više u životu na ovakve stvari. Ja ću ovdje jasno i glasno za govornicom reći kolega Hasane, predsjedniče kluba vijećnika SDA, SDA stranka nije jedini zastupnik Bošnjaka i države Bosne i Hercegovine, jer ima i ostalih stranaka koje podjednako to isto rade. Koliko god budete vi to govorili da jest ja ću izaći i reći da nije i da imaju i ostale stranke.“

Hasan Hasančević, predsjednik kluba vijećnika SDA: „ Pošto ja dobro iščitam prava i obaveze, znači nije problem i ja se slažem da neki drugi u maloj količini konzumiraju državu Bosnu i Hercegovinu kada im treba, ali SDA najviše i SDA predstavlja jedina Bošnjake. Jedina se izjašnjava javno da predstavlja Bošnjake. Ovi što su u celofanu to je njihov problem, nije naš. Lijepo je izaći i reći da sam ja za ovo i za ono, ali mi štitimo interese Bošnjaka i svih drugih i to je to.“

Mehmed Mehinović, vijećnik SBiH: „Ja neobično cijenim predsjednika kluba SDA privatno, međutim ovo stvarno prevazilazi neke ukuse. Naime, za sebe lično kažem, nisam na tom kolosijeku o kojem on govori, ali ništa manje ne branim Bosnu i Hercegovinu od svih tih koji su na tom kolosijeku, ništa manje ni milimetra, ni milimetra upamti to, a nisam na tom kolosijeku.“

Haris Sinanović, predsjednik kluba vijećnika SDP-SBiH: „ Da se nadovežem na kolegu ovdje i da bi trebalo malo obratiti pažnju, jer mislim da ovo Hasanovo izlaganje malo prelazi i u vrijeđanje i Kodeks ponašanja.“

Kenan Mujkić, direktor JZU Dom zdravlja Doboj Istok: „ Prije svega želim sve srdačno da pozdravim. Slažem se sa načelnikom i slažem se sa vijećnicom Emirom ovo je jedna zdrava diskusija i zaista treba ovako većih diskusija. Ja ću se malo vratiti na Dom zdravlja i dozvolit ćete mi da na neka pitanja odgovaram koja nisu po redoslijedu, nego po prioritetu. Što se tiče ampularnih lijekova, drago mi je da je Kemal Skopljak izašao i to obrazložio. Znači mi imamo obavezu refundiranja sredstava za hitne slučajeve, za onkološke pacijente i za peniciline. Znači to su tri skupine osiguranika kod kojih se ne naplaćuje. Kod svih ostalih prema Ministarstvu, prema odluci ministra se naplaćuje. Doktor Božo Jurić u SDP Vladi je donio odluku da se nikome ne naplaćuje. Međutim da odluka je poništena u roku od par dana. Zašto? Upravo zbog toga, kako je Kemal Skopljak rekao, to su izuzetno velika sredstva. Ono što mi radimo i ja se slažem da inspekcija radi, jer u nekim domovima zdravlja, u nekim hitnim službama naplaćuju lijekove i uzimaju pare. Mi nikada to nismo uradili

ni jednom pacijentu. Mi kažemo otidite uzmite lijekove, ako niste hitan slučaj. Nikada nismo ni nazvali ni jednog pacijenta, bar dok sam ja direktor, da mu kažemo vratite lijekove. To je na dobrovoljnoj bazi hoće li vratiti ili neće vratiti, ali mi nikada nismo ni jednog pacijenta nazvali i rekli halo tog i tog dana ste bili morate da vratite te ampularne lijekove. Znači odgovorno tvrdim da ni jednom pacijentu nije naplaćena niti jedna marka u hitnoj službi, niti jedna marka. U nekim domovima zdravlja, prema mojim informacijama, jeste i to je predmet inspekcijskih poslova. Odgovorno tvrdim da mi nismo nazvali niti jednog pacijenta da kažemo vratite, ne znam, analgin, voltaren ili bilo koji drugi lijek. Mi smo čak i proširili tu listu, npr. mi nismo obavezni da imamo kontrolok, odnosno pantoprazol ampule, ali imamo i to i damo našim osiguranicima. Znači mi postupamo prema odluci Vlade TK i prema odluci Ministarstva zdravstva gdje kažu da hitni slučajevi, a zna se šta je hitan slučaj, onkološki pacijenti i penicilini se daju besplatno, a ostali trebaju da vrata. Opet kažem mi nismo nikada rekli vratite to, to je sve na dobrovoljnoj bazi. Dalje što se tiče bolovanja, ima pravilnik o bolovanjima i mi to vama možemo dostaviti isto kao i ovo od ministra Bože Jurića, bivšeg ministra i drugih ministara koji su donosili takve odluke. Isto tako postoji pravilnik za bolovanja i mi tu nismo svezanih ruku, ali i treba se držati tog pravilnika, a i ne treba se držati tog pravilnika. Znači otprilike doktor treba sve da procijeni i sada je to sve elektronski i ono što je nama problem je što pod dijagnozom hipertenzija artieralis tamo kaže ima 10 dana i oni to gore vide u Zavodu i odmah nas zovu zašto i kako. Slažem se ja u potpunosti sa dopredsjedavajućim da to treba da se kaže ili jesi bolestan ili nisi bolestan. Znači ništa preko 42 dana i ako komisija procijeni ide se dalje, a ako ne procijeni, Bože moj. Možemo mi vama dostaviti taj pravilnik, jer faktički svako prekoračenje tih bolovanja fakturiše se Domu zdravlja. Mi smo jedne godine, zna Kemal Skopljak, 40.000 KM dali na bolovanja, jer treba da uđe inspekcija i kaže ovome ste bolovanje produžili po pravilniku i oni obračunaju. Isto kao što dolazi inspekcija za lijekove i kažu on je na esencijalnoj listi a tamo ih je nemoguće ispuniti, jer vi kada date pacijentu taj lijek, govor je o tabletama, dođu sutra iz Zavoda i svaki mjesec 3.000 – 4.000 KM Dom zdravlja mora da plati. Neka, neka plati, nije nikakav problem, jer to su naši osiguranici i mi sve dajemo da naše osiguranike. Nije da ja sada hvalim ovaj Dom zdravlja i vezano za tu anketu, što se tiče naših anketa puno je veće zadovoljstvo kod naših osiguranika nego kod te ankete. Ja se slažem da to nije dovoljno i sigurno da može bolje. Sigurno, kao što kaže Refik Šuvalić da možda treba na najudarnijim mjestima postaviti više sestara. Zavod nama priznaje dva tima hitne, a u timu hitne imate jednog ljekara, jednog vozača i jednog medicinara, ne četiri nego tri uposlenika. Tako da nam za čitav Doboj Istok priznaju šest uposlenika i faktički po njihovom bi trebalo u hitnoj službi da radi samo šest osoba. To je nemoguće. Meni treba znači jedan vozač, dva medicinara i doktor, četiri osobe i takvih treba pet timova da bih ja mjesečno pokrio i ja moram povući odnekle. Ja moram povući sa šaltera, jer odnekle ja moram tog medicinara povući. I ja zaista smatram, kao što kaže načelnik, da ni u kojem slučaju ne treba hitnu ukinuti, jer to je oslonac Doma zdravlja. Zaista oslonac Doma zdravlja. Možemo mi pričati i ovako i onako hitna, pa poslije hitne porodična je oslonac Doma zdravlja. I meni je drago što smo se pokazali lijepo u koroni i što se pokazali lijepo i poslije korone i u vakcinaciji. Isto tako hoću da kažem da je ova godina bila izuzetno izazovna. Mislim da je prava riječ izazovna, jer sve je poskupjelo. Mi smo svjedoci te inflacije. Ako vam sada ja kažem da neki repromaterijal plaćamo 100 do 200 puta više nego što se plaćalo prije agresije na Ukrajinu. Vidite u izvještajima da mi 55.000 samo na laboratoriju dajemo, a prije agresije na Ukrajinu to je bilo 12 – 15.000 KM. Nije da ja se sada tu pravdam, ali zaista imamo očekivanja da se sada od zdravstva, kao evo za te lijekove. Ja prvi da se pitam, ja bih ostavio ovakvu odluku. Zašto? Zato što imaju nehitni slučajevi i opet kažem mi nikad nismo ni jednog pacijenta nazvali da vrati te lijekove, jer to je na dobrovoljnoj bazi. Hoće li vratiti ili neće vratiti, nikad niko nije vratio i nikad nije niko zvao da se vrati. Halalit ćete mi, jer puno je bilo diskusije, pa se neka pitanja neću sjetiti. Što se tiče porodičnog ljekara u Velikoj Brijesnici, Velika Brijesnica je najveći tim u Domu zdravlja u kojem je doktor Dževad Mumić prisutan non stop. Evo u toku ovog mjeseca bio je čovjek samo odsutan kada je bio pozitivan na koronu virus. Ja ne znam kada će se neko razboliti, ali odgovorno tvrdim da je tu doktor prisutan non-stop. Zašto? Zato što je to sada prometno, prvo nalazi se na prometnoj magistrali, drugo nalazi se blizu Belamioniksa, treće nalazi se blizu tih nekih centara i ja insistiram na tome da tu non-stop bude doktor. Mi smo tamo opremili ambulantu upravo zato što je to najprometnija ambulanta. Dalje što se tiče nadogradnje Doma zdravlja mislim da je to načelnik obrazložio. To je dugogodišnji naš plan, to je dugogodišnji naš cilj i evo sa Božijom pomoći ove godine nadam se da ćemo mi konačno dobiti novu stolariju, da će se utopli Dom zdravlja, da će dobiti novo ruho i ja mislim da to Dom zdravlja i zaslužuje, apsolutno zaslužuje. To je naš dugogodišnji plan, to znaš dugogodišnji cilj i evo uz Božiju pomoć ove godine ćemo, ja to moram da naglasim i neka mi niko ne zamjeri, uz pomoć načelnika, jer je on prepoznao taj problem i uz njegovu pomoć realizovat ćemo taj projekat. Bit će realizovan projekat i ambulante u Lukavici Rijeci. Mi znamo tamo dugogodišnji problem, jer se naši pacijenti moraju da popnu na sprat, a neki ljudi ne mogu. Evo i taj ćemo problem da riješimo. Dalje u ovoj 2022. godini otvorili smo pedijatrijsku službu nakon 15 godina i ona zasad fino funkcioniše. Dalje, mi se trudimo da na neki način poboljšamo svaku uslugu naših pacijenata.

Mi na primjer u ovoj godini pokušavamo da počnemo raditi ultrazvuk srca, ne pokušavamo nego već radimo. Zahvaljujući Privatnom centru Duja nabavili smo ultrazvučni aparat i radiološku sondu. Zašto? Zato što smo vidjeli da anesteziolozi vrlo često kažu da je potreban ultrazvuk srca. Da se naš pacijent naruči gore u Tuzlu treba čekati mjesec, dva, tri, jer su vrlo često kvarovi aparata. Mi nemamo marke od toga, jer se za ultra zvuk srca refundira Kliničkom centru Tuzla. Nema veze, idemo da pomognemo na neki način. Ja opet naglašavam da li sam ja zadovoljan? Nisam, jer uvijek može bolje, kao što kaže načelnik. Ja zaista insistiram da može bolje i trebamo truditi da to bude bolje. Zašto? Tu se i moja porodica liječi, tu se liječe moji prijatelji i rodbina. Vjerujte zaista da ja nemam nekih značajnijih problema. Slažem se da ima na neke sestre pritužbi i većinom su na medicinske sestre te pritužbe, nije me mogla naručiti i sl. Uglavnom mi radimo na tome da poboljšamo kvalitet, a da li ćemo uspjeti, 100% nećemo, jer nema te zdravstvene ustanove da je 100% zadovoljstvo osim privatnih, ali u javnim nema sigurno. Dalje, ja sam izuzetno ponosan da smo mi poslovali pozitivno. Opet kažem zato što je bila izazovna godina, teška godina. Jednostavno neka sredstva smo mi sačuvali, jer sada nam idu četiri uposlenika u penziju i mi moramo pet prosječnih plata svakom uposleniku da isplatimo, pa smo i za to neka sredstva ostavili. Tako da se radi, a da li ima mjesta za poboljšanje? Ima mjesta. Što se tiče ampularnih lijekova, ja bih bio najzadovoljniji da se to nikako ne naplaćuje koliko god doktor da propiše. Ja ću vam dostaviti od bivšeg ministra Bože Jurića, on je napisao taj akt, odnosno odluku donio da se na području Tuzlanskog kantona nikakva ampularna terapija ne naplaćuje. Ta odluka ne znam da li je mjesec dana zaživjela. Zašto? Zato što su ljudi shvatili da na primjer Zavod zdravstvenog osiguranja ne bi mogao sve da finansira. Opet napominjem hitni slučajevi, onkološki pacijenti i penicilini imaju zdravstvenu zaštitu. Slažem se ovo za bolovanja zaista i da se ja pitam to je apsurd apsurd da se sada drži nekoga pravilnika koji opet kažem i jest obavezujući i nije obavezujući. Zašto? Svako prekoračenje će se naplatiti Domu zdravlja. Isto kao i za lijekove. Kažu neki lijekovi su na esencijalnoj listi i ako vi doktrinu njegovu ne ispoštujete samo fakturiše Domu zdravlja. Svaki mjesec otprilike 3.000 KM fakturiše Zavod zdravstvenog osiguranja zbog toga što je neki doktor prekoračio tu, jer mu je dao lijek koji ne pripada kako su oni gore zamislili. Ja nikada nisam nazvao ni jednog doktora skini ga sa ovog lijeka, skini ga sa inzulina, skini ga sa pumpice, plati Dom zdravlja i bože moj. To su naši osiguranici i ja ću, dok sam direktor, to sigurno raditi. Hvala vam i ja opet obećajem sa ovoga mjesta da ćemo se potruditi. Zloupotreba bolovanja, slažem se apsolutno potpisujem svaku riječ načelnika i dopredsedavajućeg Izeta. Opet to su malo veće instance, oni gore donose pravilnike, Tuzlanski kanton i Zavod donose pravila igre, mi smo tu mali. Ja sam svjestan da Dom zdravlja Doboj Istok mali i mi gore kada odemo nastojimo da kažemo ministrici, jer uzdamo se puno u ovu novu ministricu. Zašto? Zato što dolazi iz porodične medicine, a do sada su nekako svi ministri dolazili sa Kliničkog centra. Ovo je po prvi puta da ministrica dolazi iz porodične medicine i ona je upoznata sa svim problemima vezanim za bolovanja, vezanim za ampularne lijekove i za sve probleme. Ona je nama dala čvrsto obećanje da će zaista nastojati da sve te probleme riješi. Hvala vam i nemojte zamjeriti ako sam šta zaboravio, jer bila je malo veća diskusija.“

Nusret Dautović, predsjedavajući Općinskog vijeća: „Hvala lijepo, direktore. Mislim da smo iscrpili tačku dnevnog reda. Ja bih vas zamolio da sada pređemo na glasanje. Ko je za ovakav Izvještaj Doma zdravlja Doboj Istok?“

Glasanje: ZA – 15, PROTIV – 0, UZDRŽANIH – 0.

Emira Karić, predsjednica kluba vijećnika SDP, je zatražila pauzu.

Predsjedavajući je dao pauzu od 10 minuta.

Sjednica je nastavljena u 11,35 sati.

7. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2022. godinu

Nusret Dautović, predsjedavajući Općinskog vijeća: „Javlja li se neko za riječ po ovoj tački?“

Emira Karić, predsjednica kluba vijećnika SDP: „Nije džender podrška, nego zaista istinska. Znači, direktorice, dobar izvještaj, ponovo imamo sve pred sobom transparentno i jasno. Drago mi je da ste riješili po meni je bio problem za predškolsko, ali eto vi ste i taj problem uspjeli prevazići. Znači predškolsko se organizira i to mi je drago, nastavite tako, imate moju podršku. Naravno izvještaj je dobar i bit će usvojen.“

Nusret Dautović, predsjedavajući Općinskog vijeća: „ Hvala lijepo, Emira. Javlja li se još neko za riječ? Ne javlja se. Ko je za ovakav Izvještaj?“

Glasanje: ZA – 15, PROTIV – 0, UZDRŽANIH – 0.

8. Razmatranje i usvajanje Izvještaja o radu Općinske izborne komisije Doboj Istok za 2022. godinu

Nusret Dautović, predsjedavajući Općinskog vijeća: „ Javlja li se neko za riječ?“

Emira Karić, predsjednica kluba vijećnika SDP: „ Ko se sjeća moje diskusije, iskreno ja skoro nikad nisam bila zadovoljna sa izvještajem Općinske izborne komisije, sada jesam. Pratim cijeli rad a pogotovo gledajući na protekle izbore odradili ste ih časno, pošteno, odlično, javljali ste se na telefon i sve nedoumice od strane političke subjekata ste otklonili. Bilo je žalbi, je li tako i mi koji pišemo žalbe ili neko ko piše, nema stvaran uvid nego na osnovu nekih parametara uputi žalbu. Nije bilo daljnjih žalbi i otprilike ste nam sve pojasnili što je trebalo na sam dan izbora, odnosno tu noć kad je bilo prebrojavanje. Isto tako jako ste pomogli predsjednicima i po meni je ovo jedan od uspješnijih izvještaja, odnosno rada Općinske izborne komisije.“

Izet Hodžić, zamjenik predsjedavajućeg Općinskog vijeća: „ Nadam se da neću skrenuti sa teme, ali ne mogu da se ne nadovežem na ovu diskusiju, odnosno nisam znao šta će Emira diskutovati. Predsjedniče i članovi Općinske izborne komisije, čestitke u moje lično ime i u ime kluba vijećnika Naroda i pravde i nastavite tako za dobrobit svih građana općine Doboj Istok.“

Kemal Bratić, općinski načelnik: „ Ovo mi liči da su NiP i SDP zadovoljni izbornim rezultatom, pa evo i ja da čestitam predsjedniku Općinske izborne komisije na korektnom radu. Kada se radi o SDA zbilja nemamo nikakvih primjedbi na ovim prethodnim izborima. Teško smo uzeli sve nivoe oko 40% glasova. Naravno to je zasluga biračkih odbora, aktivista i transparentnosti, kao što Emira reče i dobrog rada Općinske izborne komisije. Tako je bilo i sa prethodnom Izbornom komisijom i ja ne mogu da minimiziram uvaženog Šemsudina Bećirovića koji je vodio Izbornu komisiju i taj tim koji je tada bio. Naravno iskrene čestitke i ovoj Izornoj komisiji i ja se nadam da će tako, ako bog da, biti i ubuduće.“

Emira Karić, predsjednica kluba vijećnika SDP: „ Ne minimaliziram rad prethodnika zaista, međutim nisam dobivala takve odgovore koje sam očekivala na neka postavljena pitanja na samoj sjednici i putem telefona kada su bili ti neki izborni ciklusi i zbog toga sam bila nezadovoljna, a ne da uopćeno minimaliziram rad. Ovaj puta je sve po meni bilo zaista ekspeditivno i ta obuka je bila dobra vjerovatno ili su to neki drugi parametri poklopili. Vidjet ćemo, ako bog da, bit ćete i dalje i iskreno dajem preporuke da budete, za sada po ovoj godini, stalni predsjednik ukoliko je to moguće.“

Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ? Ukoliko se ne javlja, ko je za ovakav Izvještaj Općinske izborne komisije?“

Glasanje: ZA – 15, PROTIV – 0, UZDRŽANIH – 0.

Zahvaljujem se vijećnicima i ostalim prisutnima na odvojenom vremenu i vidimo se za mjesec dana.“

Sjednica je završena u 11,45 sati.

ZAPISNIČAR
Behara Hadžić

OVLAŠTENI DRŽAVNI SLUŽBENIK
DA OBAVLJA POSLOVE SEKRETARA OPĆINE
Arnela Aljić

PREDSJEDAVALJUĆI
OPĆINSKOG VIJEĆA
Nusret Dautović

Zapisnik je usvojen na 27. redovnoj sjednici Općinskog vijeća Doboj Istok održanoj dana 25.05.2023. godine.

U Klokotnici, dana 25.05.2023. godine

Zabilješku sačinila
Arnela Aljić, ovlašteni državni službenik da
obavlja poslove sekretara općine